

Служба иконе Божией Матери «Черниговская Гефсиманская»



16 апреля 2016 г. 22:01

Текст службы иконе Божией Матери «Черниговская Гефсиманская» утвержден решением Священного Синода от 16 апреля 2016 года ([журнал № 15](#)).

Служба иконе Божией Матери «Черниговская Гефсиманская»

Месяца сентября в 1-й день

Новолетие церковное и празднование Пресвятей Богородице, ради иконы Ея, именуемая Черниговская Гефсиманская

На велицей вечерни

На Господи, возвах: стихиры Богородице, глас 2.

Подобен: Егда от Древа:

Всех скорбящих Радосте,/ и обидимых Предстательнице,/ и убогих Питательнице,/ странных же Утешение, и Жезле слепых,/ немощных Посещение,/ труждающихся Покрове и Заступнице,/ и сирых Помощнице,/ Мати Бога Вышняго, Ты еси Пречистая:/ потщися, молимся, спастися рабом Твоим. *(Дважды)*

Всем Предстательницу Тя человеком,/ всем Прибежище великое,/ всем Заступницу Тя показа, Владычице, христианом,/ Иже из Тебе в наше смешение облечеса/ и распятие и смерть нас ради подъят./ Того убо моли непрестанно/ всем очищение низпослати прегрешений, Богоневестная. *(Дважды)*

Инаго прибежища, Чистая,/ ко Творцу и Владыце не имамы,/ разве Тебе, Богоневесто,/ да не оставиши нас теплым Твоим предстательством,/ ниже отринеш ли любовь притекающа честному образу Твоему поклонитися,/ от негоже источники милости Твояе нам источи,/ потребное нам во вся дни жития нашего подающи.

Слава, глас 6:

Иже со Духом Святым соединен,/ Безначальне Слове и Сыне,/ всех видимых и невидимых Содетелю и Зиждителю,/ и венец лета благослови,/ сохраняя в мире православных множества,/ молитвами Богородицы, и всех святых Твоих.

И ныне, глас 2:

О, великаго таинства!/ Видя чудеса, проповедаю Божество,/ Еммануил убо естества двери отверзе, яко Человеколюбец,/ девства же затворы не разверзе, яко Бог,/ но тако из ложесн пройде, якоже слухом вниде,/ тако родися, якоже и зачатся,/ безстрастно вниде и неизреченно изыде,/ по глаголющему пророку:/ та дверь затворена будет, и никтоже пройдет сквозе ея,/ токмо Един Господь Бог Израилев,/ имей велию милость.

Таже вход. Прокимен дне. И чтения Богородичная.

На стиховне стихиры и славник новолетия.

И ныне, глас 6:

Преложение скорбящих,/ Премениение болящих еси, Богородице Всепетая,/ спаси град и люди,/ боримых умирение, обуреваемых тишина,/ Едина Предстательнице верных.

Тропарь индикта и Богородице, глас 5:

Похвалами венчаем, Владычице Богородице,/ венценосный Черниговский образ Твой,/ от негоже явлением чуда/ в Гефсимании земли Радонежския/ благослови Господь венец лета благодати Своея./ И ныне прилежно молимся Ти, Всецарице:/ венчай благословеньми поющая тя.

На утрени

По 1-м стихословии седален, глас 2:

Притецем к тихому пристанищу/ и Заступнице рода нашего, Деве Марии,/ поклонимся честному Ея образу, умильно зовуще:/ призри, Благосердая Мати, на лютыя скорби, нас обдержаша,/ и исцели болезни душ наших.

По 2-м стихословии седален, глас 3:

Притекающе к многоцелебному образу Твоему, Дево Богородице,/ вемы Тя христиан Предстательницу,/ к Сыну бо Твоему и Богу нашему присно молебне рече Твои о нас простираеши, Всенепорочная,/ и спасаеши от бед верою и любовию Богородицу Тя почитающих.

По полиелеи седален, глас 5:

Страждущая жена, тяжким недугом обдержима,/ к Твоему пречистому образу притекши, Богомати,/ слезную молитву смиренно сотвори,/ врачевство цельбоносное просящи подати,/ и во уповании своем не посрамленна отыде,/ верных Источник исцелений созывающи прославити:/ приидите и видите, яже сотвори ми Господь,/ предстательством Пречистыя Своея Матере.

По 50-м псалме стихира, глас 6: Не имамы иныя помощи:

Канон Богородице, глас 2.

Песнь 1

Ирмос: *Грядите людие,/ поим песнь Христу Богу,/ раздельшему море и наставльшему люди,/ яже изведе из работы египетския,/ яко прославися.*

Покровительница обители Гефсиманския Ты еси, Богородительнице,/ помози нам прославити Тя/ и разрешение прегрешений подаждь благочестно поклоняющимся образу Твоему.

Якоже на одре болезни лежащая жены моления послушала еси, Владычице,/ тако и наше смиренное воздыхание не отрини,/ но, Сама заступивши, злаго обстояния избави рабы Твоя.

Поведует обитель Гефсиманская, яже от образа Твоего бывшая чудеса,/ той бо источник соделася, исцеления струи обильно изливающий,/ верою призывающим имя Твое, Богомати.

О, Всепетая Мати, страждущая жена рече,/ даруй ми исцеление, да, восставши, поклонюся образу Твоему святому./ Ты же, приклоньшия к ея молению,/ просимая подала еси, Пречистая.

Катавасия: *Крест начертав, Моисей:*

Песнь 3

Ирмос: *Утверди нас в Тебе, Господи,/ Древом умерщвлей грех,/ и страх Твой*

всади/ в сердца нас, поющих Тя.

Тя похвалу, вернии, стяжахом,/ прибежище и утверждение и радование, и душам спасение,/ надежду же и стену, покров и заступление, Богоблагодатная Владычице.

Не усыпает о нас в молитвах Пречистая Мать Спасова/ и являет чудное Свое милосердие всем, верою притекающим/ и любовь святому Ея образу поклоняющимся.

Приклонися к мольбам рабов Твоих, Владычице,/ и не закосни избавити нас от бед и скорбей, яже обдержат нас,/ видимых и невидимых врагов отжени,/ да не зле погибнем, окаянии.

Милостивым и кротким Твоим оком, Богородительнице,/ призри на нас, недостойных,/ и от напасти обстоящая свободы,/ призывающих Тя на помощь, Всепречистая.

Седален, глас 4:

Твоего милосердия дарования воспоминающе, Владычице,/ и Твой чудотворный образ благоговейно лобызающе,/ яко посреде нас пребывающую Тя помышляем и верою Тебе вопием:/ Твоего Сына и Господа моли,/ да научит нас заповеди Его всегда творити,/ злыя же искушения побеждати,/ и Тебе, Предстательницу нашу, достойно пети и славити во веки.

Песнь 4

Ирмос: *Услышах, Господи, глас Твой, егоже рекл еси, / глас вопиющего в пустыни,/ яко воззремел еси над водами многими,/ Твоему свидетельствуяй Сыну,/ весь быв сошедшаго Духа, возоти: / Ты еси Христос, Божия Мудрость и Сила.*

Владычице Пречистая, елика просим днесь от Тебе прияти,/ сия от чудотворныя Твоя иконы нам подаждь,/ немощное наше произволение утверди/ и Небесных благ желание в сердца наша всели.

Спасения Тя надежду, молитву неусыпну, заступление твердо **и** мамы:/ умилосердися и виждь нашу нестерпимую печаль, болезни и скорби/ и милостивно посети, Мати Божия,/ ослабу скорую подающи.

В скорбех Тя Заступницу стяжахом, Владычице,/ темже и ныне помози нам, люте обуреваемым,/ руку помощи простирающи, Чистая:/ буди милостива болезнем нашим, Мати Божия,/ изцеление скорое подающи.

Смири, Владычице, выю врагов вознесенную,/ советы тех и сердца злонравная укроти,/ крепость же подаждь призывающим Тя, Мати Божия,/ победу скорую подающи.

Песнь 5

Ирмос: *Ходатай Богу и человеком был еси, Христе Боже,/ Тобою бо, Владыко, к Светоначальнику Отцу Твоему/ от нощи неведения/ приведение мамы.*

Мнози леты тяжким недугом связанная жена, здравие Тобою уллучивши,/ созывает верныя прославити чудная дела Твоя, Богородице, зовущи:/ радуйся, Источнице дарований, Богоблагодатная Дево.

Неизследимую бездну Твоя милости расслабленная жена познавши,/ пред святою Твоею иконою усердную молитву Тебе принесе/ и, абие исцеление от недуга своего приемши,/ здрава в дом свой возвратися, Тя воспевающи.

Священная икона Твоя/ другая Силоамская купель показася, Владычице,/ очищающая и изцеляющая болезни душ и телес,/ верою приходящих к ней/ и Тя любовь величающих.

Приступим, вернии, с любовью к чудотворному образу Приснодевы/ и благоговейне ему поклонимся,/ се бо в нем чудес силу Всеблагая Владычица являет и вся спасает,/ с верою несумненною почитающих пречистаго лика Ея подобие.

Песнь 6

Ирмос: *В бездне греховней валяясь,/ неизследную милосердия Твоего призываю бездну:/ от тли, Боже, мя возведи.*

Избави нас от напастей и бед, Богоневесто,/ Тя бо Ходатаицу устрои Бог во спасение наше и заступление./ Сего ради исходатайствуй нам, недостойным,/ от печали греховных избавление.

Поем Тя и поклоняемся Ти, Богомати Дево,/ верою и любовью проповедающе многая и преславная чудеса,/ от иконы Твоя чудотворных явленных./ Темже от всяких нас бед избави.

О, благоутробия Твоего, Дево Чистая!/ Свобождаеши бо безмерных печали и напасти в нуждах и обстояниях Тя призывающих./ Темже и ныне, Благословенная, Заступница нам буди.

Ведущи немощи наша, Богородительнице,/ уврачуй духовных недуги наша,/ да славословим Сына Твоего и Бога нашего,/ яко Врача всяческих.

Кондак, глас 8:

Притецем, вернии, к многоцелебному образу Заступницы нашей, Богородицы Марии,/ и, припадающе к нему с любовью, сице рцем:/ о, Всепетая Мати, призри Твоим милосердием на ны, недостойных,/ и яви нам Твоя милости и щедроты:/ в болезнях исцеление, в скорбех утешение, в бедах заступление/ и вся ны спаси, на Тя уповающия, да зовем Ти:/ радуйся, Дево, христиан заступление.

Икос:

Яко дар прияла еси, Мати Божия, всех христиан недуги исцеляти,/ от бед избавляти, от пленения спасати и от врагов заступати;/ не презри и нас, Всемиловитая Госпоже, Богородице, Тебе вопиющих:/

Радуйся, Ангелов удивление;

радуйся, мира утешение.

Радуйся, христиан радование;

радуйся, монахов утверждение.

Радуйся, подвизающихся укрепление;

радуйся, Радосте скорбящих.

Радуйся, болящих исцеление;

Радуйся, заблуждших вразумление.

Радуйся, Утолительнице печалей

Радуйся, Дево, христиан заступнице.

Песнь 7

Ирмос: *Да преславное Рождество Твое, Христе, еже от Девы,/ прообразиши яве,/ неопалимы в пещи отроки сохранил еси,/ песньми поюция Тебе:/ отцев Боже, благословен еси.*

Яви скорое Твое заступление, Владычице,/ можеши бо, яко Мати Божия./ Темже призываем Тя сердечне, со слезами припадающе/ и надежду на Тя несумленную возлагающе.

Надежда благая и Заступница верных Ты еси, Владычице:/ сего ради молимся

Тебе даровати милости богатыя всем,/ уповающим на Тя и зовущим:/ благословена, Яже Бога плотию рождшая.

Яже едино упование и помощь верных, Богородительнице,/ потщися помощи рабом Твоим, обуреваемым скорбьми и во гресех сущим,/ любовь же к Тебе прибегающим.

О, дивное чудо!/ Разслабленная бо жена,/ лобызаючи цельбоносную икону Твою, Мати Божия,/ скоро крепость телесную ощути и благодарно возопи:/ благословена Ты еси, Пречистая.

Песнь 8

Ирмос: *В пещь огненную ко отроком еврейским снизшедшаго/ и пламень в росу преложшаго Бога,/ пойте дела, яко Господа,/ и превозносите во вся веки.*

Прибежище наше и миру радование, Богородительнице,/ умилосердися и скоро благодать Твою подаждь нам, скорбным,/ и заступи, Благая, рабы Твоя.

Тя от всея души неложно призывающих, Богородице,/ во всякой скорби и в болезнях различных,/ бедах и обстояниях лютых спешно услыши,/ сих избавляючи присно молитвами Твоими.

Безсмертия зарю и источник спасения вемы Тя, Богородице,/ яко рождшую Отца Безсмертного Слово,/ от смерти избавляющее вся,/ превозносящая Его во веки.

Спаси от зол и скорбей рабы Твоя, Богородице,/ и мир Божий, превышший всякаго мира земнаго,/ подаждь рабом Твоим, Тя воспевающим.

Песнь 9

Ирмос: *Недоумеет всяк язык благохвалити по достоянию,/ изумевает же ум и премирный пети Тя, Богородице:/ обаче, Благая сущи, веру приими,/ яко любовь веси божественную нашу,/ Ты бо христиан еси Предстательница, Тя величаем.*

В молитвах неусыпающую Богородицу Чистую призовем вси, взывающе:/ избави от лютыя смерти и огня геенскаго рабы Твоя,/ Ты бо христиан еси Предстательница, Тя величаем.

Отчаявшихся крепкое прибежище,/ обуреваемых тихое пристанище Ты еси, Богородице./ Темже и мы притекаем к Тебе, взывающе:/ спаси нас, усердно Тя величающих.

Не престай, Чистая, молящи от Тебе рождшагося Бога/ о всех, с верою притекающих к Тебе/ и просящих избавления,/ Ты бо христиан еси Предстательница, Тя величаем.

Дар от Бога прияла еси, яко Мати Божия,/ недуги исцеляти и от бед избавляти,/ о гресех умоляти и от пленения спасати./ Не презри и нас, Госпоже Премилостивая,/ Ты бо христиан еси Предстательница, Тя величаем.

Светилен индикта.

Слава, и ныне, Богородицы:

Днесь, вернии, сошедшися,/ поклонение достойное Твоему, Пречистая, образу приносят,/ покрова и заступления Твоего просяще и зовуще:/ принеси о нас Сыну Твоему и Богу нашему теплое Твое моление.

На хвалитех стихиры самогласны индикта.

Таже стихиры Богородицы, глас 1.

Подобен: О, дивное чудо:

О, дивное чудо!/ Источник исцелений,/ честный образ Твой верным показася, Владычице,/ недугующим телесем врачевство источая,/ и болезни душевныя утоляя/

сего ради вси земнороднии,/ благоговейне лобызающе лика Твоего изображение,/ из глубины души приносят Ти похвальное пение, взывающе:/ радуйся, Благодатная,/ Тобою бо Господь/ подают с верою притекающим милость и исцеление.

О, дивное чудо!/ Верным показала еси, Пречистая, украшение:/ пророком исполнение,/ апостолом слава,/ мучеником удобрение,/ девствующим похвала/ и всему миру предивный Покров./ Покрый, Владычице, милостию Твоею/ верою поклоняющихся образу Твоему честному/ и с любовию пред ним Тебе вопиющих:/ Обрадованная, радуйся, с Тобою Господь,/ подаяй миру Тобою велию милость.

О, Премилосердная Владычице!/ Дивно Твое о нас ко Господу предстательство,/ день бо и ночь Престолу Сына Твоего предстоиши,/ молебне руке за ны к Нему простирающи/ и милости источник отверзти просящи,/ похвальное пение из глубины души Ти приносящим:/ радуйся, Благодатная,/ Тебе бо ради Господь/ праведный гнев на милость прелагает.

Слава, индикта. И ныне, глас 8:

Владычице, прими молитвы раб Твоих/ и избави нас/ от всякия нужды и печали.

Таже славословие великое и отпуст

На Литургии

Прокимен индикта, глас 3: Велий Господь наш, и велия крепость Его,/ и разума Его несть числа. Стих: Хвалите Господа, яко благ псалом. И Богородицы прокимен, глас 3: Величит душа моя Господа и возрадовася дух Мой о Бозе, Спасе Моем: Апостол к Тимофею, зачало 282: И Богородицы, к Филипписием, зачало 240: Аллилуиа, глас 4: Тебе подобает песнь, Боже, в Сионе. Стих: Благословиши венец лета благости Твоя, Господи. И Богородицы: Слыши, Дщи, и виждь и приклони ухо Твое. Евангелие Луки, зачало 13: И Богородицы: Луки, зачало 54: Причастен: Благословиши венец лета благости Твоя, Господи. Другий: Чашу спасения прииму и Имя Господне призову.